



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

11 APRIL 2022 (ISNIN)



KEMENTERIAN PERDAGANGAN DALAM NEGERI
DAN HAL EHRAH PENGOLINA

KERATAN AKHBAR DAN MEDIA ONLINE (KPDNHEP)

11 APRIL 2022 (ISNIN)

'Bukan tidak serik, tetapi terpaksa jual RM10 sekilogram'

Oleh ROSALINDA MD.SAID
rosalinda.said@mediamulia.com.my

KUALA TERENGGANU: Kalangan 12 peniaga ayam di Pasar Chabang Tiga yang dikompaun RM500 baru-baru ini kekal menjual barangan berkenaan pada harga RM10 sekilogram demi meneruskan kelangsungan perniagaan mereka.

Bercakap kepada *Utusan Malaysia*, seorang peniaga, Wali Ridzuan Hudin Abdul Manan, 36, berkata, walaupun bakal berdepan tindakan saman oleh pihak berkuasa, kesemua mereka bersedia menanggung akibat kerana gagal mematuhi harga minimum sebanyak RM8.90 sekilogram yang ditetapkan.

Katanya, tindakan melanggar harga berkenaan terpaksa dilakukan bagi menampung kos operasi memecah RM120 setiap hari.

"Kami bukan sengaja melanggar peraturan tetapi terpaksa. Kalau ikut harga ditetapkan, saya dan kawan-kawan tidak boleh cari makan sebab ayam yang dibeli daripada pembekal sudah RM8.70 sekilogram.

"Dalam sehari kos operasi setiap hari termasuk upah seorang pekerja di samping ais dan plastik pun mencecah RM120, jadi bagaimana saya mahu menampung semua itu jika pulangan cuma 20 sen untuk setiap ayam yang terjual," katanya semalam.

Khamis lalu, suasana di Pasar Chabang Tiga kecoh apabila seramai 11 peniaga termasuk seorang pemborong dikenakan kompaun



KALANGAN peniaga ayam di Pasar Chabang Tiga kekal menjual pada harga RM10 sekilogram walaupun dikenakan kompaun serta-merta RM500 baru-baru ini. - UTUSAN/PUQTRA HAIRRY ROSLI

serta merta sebanyak RM500 seorang gara-gara menjual ayam segar melebihi harga RM8.90 yang ditetapkan.

Menerusi video berdurasi satu minit 37 saat yang tular di media sosial, seorang peniaga mendakwa terpaksa mengorbankan wang bagi membeli pakaian raya anak-anaknya bagi membayar kompaun Kementerian Perdagangan Dalam Negeri dan Hal Ehwal Pengguna (KPD-NHEP).

Wali Ridzuan Hudin berkata,

tindakannya menularkan video berkenaan bukan untuk mencetuskan kontroversi sebaliknya, mahu semua pihak termasuk kerajaan dan pengguna memahami bebanan yang ditanggung peniaga sebagai mangsa keadaan.

Katanya, pendedahan itu sekali gus membuatkan rata-rata pengguna sedar situasi sebenar dan tidak lagi mengecam peniaga kerana menjual mahal, malah jualan ayam di kedainya berjalan seperti biasa dengan se-

hingga 75 ekor laris dalam sehari.

Bagaimanapun, dia menafikan dakwaan kononnya peniaga di pasar berkenaan menipu pengguna dengan mempamerkan harga minimum, namun mengenakan nilai yang lebih mahal.

Sementara itu, Wali Ridzuan Hudin mengakui beberapa individu pemurah tampil mahu menghulurkan bantuan kerana simpati nasib dialaminya, namun terpaksa ditolak kerana masih berkemampuan.

Peniaga ayam gesa KPDNHEP siasat pembekal

KUALA TERENGGANU:

Walaupun dikecam teruk kerana gagal mengemukakan bukti pembelian mahal, kumpulan peniaga ayam di Pasar Chabang Tiga di sini nekad tidak akan mendedahkan pembekal mereka.

Bercakap kepada *Utusan Malaysia*, seorang peniaga yang enggan dikenali berkata, tindakan mendedahkan butiran berkenaan bakal memusnahkan perniagaan mereka kerana berisiko diugut pembekal.

Katanya, jika keadaan itu berlaku tentunya bekalan ayam akan dihentikan pihak pembekal serta-merta sekali gus menyebabkan mereka kehilangan mata pencarian utama.

"Semua peniaga ada resit pembelian tetapi tidak boleh didedahkan kepada penguatkuasa kerana takut dihentikan bekalan.

"Ramai yang tidak tahu realiti kami yang sentiasa tersepit, macam mana kami nak cari makan kalau pembekal ugut menghentikan bekalan dan keadaan menjadi lebih buruk jika ada peniaga yang masih berhutang dengan mereka. Sudahlah tidak dapat berniaga dan terpaksa melangsakan hutang pula," katanya semalam.

Khamis lalu, seramai 11 peniaga termasuk seorang pemborong di Pasar Chabang Tiga dikenakan kompaun serta merta sebanyak RM500 seorang gara-gara menjual ayam segar melebihi harga RM8.90 yang ditetapkan.

Menurut peniaga berkenaan, dilema mereka itu bagaimanapun disedari Kementerian Perdagangan Dalam Negeri dan Hal Ehwal Pengguna (KPDNHEP), sekali gus berharap pihak penguatkuasa dapat melakukan pemeriksaan terhadap pembekal berdaftar.





PENIAGA dilihat menjual ayam mengikut harga siling ditetapkan kerajaan di Pasar Harian Selayang, Kuala Lumpur.

Subsidi 60 sen sekilogram ayam

Peruntukan RM300j sudah diluluskan untuk menstabil harga

Oleh Ekhwan Haque
Fazlul Haque
ekhwan@hmetro.com.my

Kuala Lumpur

Harga ayam sepatutnya tidak mengalami kenaikan mendadak, memandangkan kerajaan sudah memberi subsidi di peringkat ladang.

Timbalan Menteri Perdagangan Dalam Negeri dan Hal Ehwal Pengguna Datuk Rosol Wahid berkata, peruntukan dianggarkan RM300 juta sudah diluluskan kerajaan untuk menstabilkan harga.

Menurutnya, setiap kilog-

ram ayam di ladang akan menerima subsidi 60 sen dan ia adalah komitmen kerajaan untuk menstabilkan harga.

"Apabila subsidi diberikan kepada penternak, mereka boleh jual kepada pemborong dengan harga lebih rendah dengan RM5.60 sekilogram.

"Manakala pemborong pula menjual RM7.60 sekilogram kepada peniaga dan pengguna akan menerima harga siling RM8.90 sekilogram.

"Tapi kenaikan harga dalam rantaian ini berlaku jika masih ada pihak yang mahu mengaut keuntungan ber-

ganda memandangkan permintaan tinggi," katanya ketika dihubungi Harian Metro.

Rosol berkata, penguatkuasaan yang dijalankan kementerian juga mendapati ada peniaga yang enggan berkongsi maklumat lanjut mengenai kenaikan harga.

Katanya, keadaan ini menyukarkan kementerian mengambil tindakan kepada pihak yang culas dan mahu untung berganda.

"Ada peniaga enggan bagi maklumat kenaikan harga kerana takut pemborong tidak mahu bekalkan ayam kepada mereka.

"Apabila dakwa harga naik daripada pemborong, mereka perlu tampil beri maklumat dan dokumen berkaitan seperti resit sebagai bukti kenaikan.

"Tindakan terpaksa diambil jika tiada bukti kukuh yang boleh dikemukakan peniaga," katanya.

Polemik kenaikan harga ayam mentah sudah berlautan, namun kembali stabil untuk tempoh beberapa bulan lalu.

Namun sejak awal Ramadan, pengguna dan peniaga merungut ekor kenaikan harga ayam sehingga terpaksa dijual melebihi harga siling.



Orang ramai membeli barangan keperluan di pasar pagi di Penaga.
(Foto Darial Saad/BH)

Penguat kuasa sita 653kg minyak masak bersubsidi

Tumpat: Penguat kuasa menyita 653 kilogram (kg) minyak masak bersubsidi di Kampung Bendang Pak Yong, di sini, semalam yang cuba diseludup ke Thailand.

Ketua Pegawai Penguat kuasa Kementerian Perdagangan Dalam Negeri dan Hal Ehwal Pengguna (KPDNHEP) Kelantan, Azanizam Affendi Juri, berkata rampasan itu dilakukan bersama anggota daripada Ibu Pejabat Polis Daerah (IPD) Tumpat.

"Kenderaan penyeludup dipandu dalam keadaan mencurigakan sebelum ditahan di ja-

lan di Kampung Bendang Pak Yong, namun pemandunya berjaya melarikan diri ke dalam semak.

"Kami menjumpai minyak masak bersubsidi anggaran 653kg disyaki untuk tujuan penyeludupan ke negara jiran.

"Nilai rampasan minyak masak paket satu kg bersubsidi yang disita itu dianggarkan RM1632.50," katanya semalam.

Azanizam Affendi berkata, daripada jenama dan pembungkusan, minyak masak terbabit diperoleh dari Terengganu.



Jadirman menunjukkan ketiadaan stok minyak paket di kedainya di Taman Molek, Johor.

(Foto Nur Aisyah Mazalan/BH)

Peniaga kena tempias stok minyak masak paket terputus

Bekalan sukar diperoleh, tak konsisten sukarkan pengguna

Oleh Mohamed Farid Noh dan Yun Mikail
bhnews@bh.com.my

Johor Bahru: Isu bekalan minyak masak paket bersubsidi satu kilogram (kg) di bandar raya ini yang sering terputus, bukan saja menimbulkan keresahan pengguna, malah menjejaskan peniaga.

Tinjauan di kedai runcit dan pasar besar sekitar Plentong, Johor Jaya dan Iskandar Puteri, mendapati rak atau tempat khas minyak paket di semua lokasi terbahit kehabisan stok.

Notis dipasang di kebanyakan kedai dan pasar raya yang ditinjau memaklumkan ketiadaan bekalan bahan itu.

Peniaga kedai runcit di Plentong yang hanya mahu dikenali sebagai Jadirman, 22, berkata stok minyak masak paket yang sering terputus bekalan dan tidak konsisten itu menyebabkan pengguna, terutama B40 kecewa.

"Saya turut bingung stok minyak masak paket semakin sukar diperoleh walaupun sudah membuat pesanan kepada pembekal. Sudah puas dimarahi pengguna yang tuduh pekedai menyembunyikan minyak paket. Padahal bekalan memang tiada, walaupun sudah dipesan dari pembekal."

"Sudah hampir dua minggu minyak paket tidak dihantar pembekal dan menjejaskan golongan B40 yang terpaksa membeli minyak botol yang harganya lebih mahal. Saya memang hadkan pembelian hanya tiga paket minyak, tetapi biasanya semua bekalan akan habis tidak sampai tiga hari."

"Pembekal juga menghantar bekalan tidak banyak seperti dulu," katanya ketika ditemui.

Kelmarin, media melaporkan minyak masak paket bersubsidi yang dijual RM2.50 sekilogram, habis di beberapa lokasi di bandar raya ini sejak dua minggu lalu. Tinjauan di Tampoi dan Pandan, mendapati beberapa kedai dan pasar raya mendakwa kehabisan stok berikutan permintaan tinggi dan bekalan yang tidak banyak.

Dalam pada itu, Pengurus Besar Econsave di sini, Mas Imran Adam, mengakui bekalan minyak masak paket terputus be-

kalan di beberapa cawangan pasar raya besar berkenaan.

"Minyak masak paket memang semakin sering terputus bekalan, bukan sekarang sahaja, malah sejak tahun lalu. Bekalan diterima juga tidak sebanyak dahulu menyebabkan beberapa cawangan kami kehabisan stok selepas hanya beberapa hari stok baharu diletakkan."

"Ia menimbulkan persoalan kerana minyak masak paket mempunyai kuota ditetapkan kerajaan, namun semakin ketara berkurangan kebelakangan ini. Pesanan dibuat juga dikurangkan pembekal yang mendakwa tidak cukup bekalan," katanya.

Sementara itu tinjauan di sekitar Kota Kinabalu, Sabah mendapati ramai pengguna mengakui tidak berlaku kenaikan harga ayam walaupun ada pemborong berdepan masalah kekurangan bekalan ayam import.

Bagaimanapun, pengguna menyuarakan kebimbangan kemungkinan harga ayam akan meningkat menjelang minggu akhir Ramadan.

Sarman Ruki, 69, berkata dia sering menemani isterinya membeli barangan dapur seperti ayam dan mendapati harga barang basah itu masih sama RM12.30 sekilogram bagi bahagian paha.

Bekalan minyak masak peket 1 kilo terputus

Johor Bahru: Tinjauan di kedai runcit dan pasar raya besar di sekitar Plentong, Johor Jaya dan Iskandar Puteri mendapati berlaku terputus bekalan minyak masak peket bersubsidi satu kilogram.

Rak barang yang menempatkan minyak peket berkenaan kosong, malah notis bekalan habis turut dipamerkan peniaga.

Peniaga, kedai runcit di Plentong yang hanya mahu dikenali sebagai Jadirman, 22, berkata, stok minyak masak peket yang sering terputus bekalan dan tidak konsisten itu menyebabkan pengguna terutama golongan B40 kecewa selain mempertikaikan keadaan berkenaan.

Katanya, dia turut bingung dengan ketiadaan stok bahan mentah itu sekali gus semakin sukar diperolehi walaupun sudah membuat pesanan kepada pembekal.

"Saya sudah puas dimarahi pengguna yang menuh pekedai menyembunyikan minyak peket padahal bekalan memang tiada walaupun sudah dipesan daripada pembekal.

"Kali ini sudah hampir dua minggu minyak peket tidak dihantar pembekal dan menjejaskan golongan

B40 yang terpaksa membeli minyak botol yang lebih mahal untuk persediaan terbuka puasa.

"Saya memang menghadkan pembelian hanya tiga peket minyak, tetapi memang biasanya akan habis tidak sampai tiga hari. Pembekal juga menghantar bekalan yang tidak banyak berbanding dulu," katanya ketika ditemui semalam.

Kelmarin, media melaporkan minyak masak peket bersubsidi yang dijual dengan harga RM2.50 sekilogram, habis di beberapa lokasi bandar raya ini sejak dua minggu lalu.

Tinjauan di Tampoi dan Pandan di sini mendapati beberapa kedai serta pasar raya mendakwa kehabisan stok minyak masak peket berikutan permintaan yang tinggi dan bekalan yang tidak banyak.

Dalam pada itu, Pengurus Besar Econsave, Mas Imran Adam mengakui bekalan minyak masak peket terputus di beberapa cawangan pasar raya besar itu.

"Minyak masak peket semakin sering terputus bekalan sejak tahun lalu. Bekalan yang diterima juga sudah tidak sebanyak dahulu menyebabkan beberapa cawangan kami cepat kehabisan stok," katanya.



PENIAGA menunjukkan ketiadaan stok minyak peket di kedainya di Taman Molek, Johor.

Senarai Harga Barangan Keperluan	
• Ayam	RM8.90
• Daging Lembu Tempatan	RM45
• Daging Lembu Import	RM28
• Telur Gred A	RM12.60
• Ikan Kembung	RM15
• Minyak Masak	RM6.35
• Gula Pasir	RM2.75
• Bawang Besar Holland	RM2.59
• Bawang Putih	RM4.99
• Cili Merah	RM8.99
• Kubis Bulat Tempatan	RM3.49
• Tepung Gandum	RM2.25

*Harga (RM/kg) Sumber: KPDN-HEP